



Caeg Makmaenj



偷李子

□ Cunch Yujingh / 钟汝荆



Baihna j aen suzse dou miz aen suenmak iq ndeu, ndaem miz geij go makdauz makmaenj, hoeng dou cungj mbouj haeusim geij go haenx mwhlawz dawz mak.

Ngoenz he gou youq gwnz dingjranz dak denz, rumzhaenq bongj mbaw denz gou doek roengz ndaw suen bae, venj youq nga faexmakmaenj he. Mwh cuengqhag haeujbae duengj aeu denz dauq, sawqmwh yawjraen ndaw mbawfaex miz maz doxgaiq luenzlulu. O, dwg gij aen makmaenj bw! Sikhaek myaiz couh yaek conh lo, gou haujlai nanz mbouj ndaej gwn makmaenj gvaq lo. Danghnaeuz youq ranzmbanj, gou itdingh mbaet baenz daeh dawz ma geb guh baenz soemj, gwn makmaenj geb soemj ndaej siu ndat ne! Hoeng, seizneix youq Baekging, Baekging mbouj raen miz maz vunz gwn gijneix, daengx aen gingsingz hix mbouj raen miz vunz gai, siengj gwn hix cij ndaej siengj ndwi. Siengj mbouj daengz ndaw hagdangz cix miz makmaenj.

Gou mbouj gamj mbaet aeu lwgmaenj ma gwn, cijndei gwed denz dauqbae.

“Gyoengq beixnuengx! Ndaw suen iq miz makmaenj!” Gou angq dwk coh doengh boux doengzhag caemh rug haenx naeuz. Gyoengqde cungj dwg daj baihnanz daeuj, cungj ngah lwgmaenj, sikhaek bibi bedbed doxyaeng yaek baenzlawz caeg aeu.

“Raeuz bae ndomq cinj gonq, yanghaemh cij bae mbaet!”

“Doengxngoenz vunz byaij lai, hawj vunz yawjraen couh deng ngeiz ha.”

“Ei——Yienghneix raeuz couh daj aen cueng vut gik haiz roengzbae, cang yiengh haeujbae gip haiz baenz mbouj?” Boux he ngvanh ok diuz cawjeiq neix daeuj.

Daengx aen rug fwd dinghrwdrwd roengzdaej.

Yienznaeuz banhfap neix hix mbouj suenq loek, hoeng byawz hix mbouj nyienh guh, lau vunz ngeiz saetlaex! Ndigah bouboux cungj haep bak cang ngoemx.

Caem haujlai nanz le, boux mbeilaux he gag naeuz: “Aeya, yienghneix gou bae nw! Baenz le lai hawj gou saek song aen makmaenj gwn couh ndaej lo!” Bouboux cungj ngaekgyaeuj dwddwd naeuz ndaej le, de couh hai cueng vut haiz, enj aek byaij ok aen rug, lumj boux gwzming lezsw byaij coh dieggajvunz nei.

Yaep ndeu, cij raen de ciuq giva song da baenqlulu doeng ndomq sae ndomq cangguh yiengh ra haiz. Saek song faencung le, de couh cacoemj buet ma. Sikhaek miz vunz bae gven dou ndei cam naeuz: “Baenzlawz yiengh baenzlawz yiengh!” Gyoengqdou mbouj rox fatseng maz saeh, simgip baenzlai. De mbouj gangj coenz, gaem hwnj cenj raemx ndeu, menhmenh ndoet, caen dwgcaengz.

Deq de gwn raemx gaeuq, dauqdaej nyienh gangj: “Ndaw suen makmaenj cij miz go ndeu miz mak, mbouj suenq lai, ngamqngamq gaeuq raeuz gwn donq he.” Dingq sat ndaw rug bouboux hemqhuhu hwnjdaej, miz di saetmuengh. De youh laebdaeb

gangj naeuz: “Hoeng, gogo makdauz cungj miz mak gig lai, demq yawj saek song aen singhgiz couh yaek cug lo! Lij miz go hwzdauz he, mwhneix dawz miz haujlai lwgmak iq, daengz haggeiz baihlaj couh gwn ndaej lo!” Dingq naeuz lij miz makdauz caeuq makhwzdauz, dou youh angqvauvau.

Baenzneix, dou nyinhnaeuz ndaej gwn donq makmaenj hix beij mbouj ndaej gwn ndei, baezneix caeg makmaenj gonq. Mbwn laep dingh, dou caenh hawj boux ngamq bae ndomq gvaq haenx caeuq boux he bae mbaet mak. Lau vunz bae lai yungzheih deng bouxwnq rox!

Song boux de couh riengjret bae le, dou youq ndaw fuengz cingjleix aen daiz ndei, bwh raemx、gyu、dangz. Mbouj daengz aen roetgyaeq nanz makmaenj couh caeg dauq lo. Daengx rug angqyangyang, youh ciengq youh diuj lumj gvaq ciet nei.

Yienznaeuz makmaenj mbouj lai, hoeng, faenh simcingz neix gig nanz ra ha.



Sai:
Ngeih sam nyied ndaem ho,
Baenz go mbouj baenz gyaеuj,
Cib nyied vunz sou haeux,
Gou bae aeu goenq fiengz.

Mbwk:
Vunz ndaem mwngz doengz ndaem,
Caemh cingq ndaej doengz sou,
Vunz ndaem mwngz hoengq youq,
Seizcou sou gijmaz?

Sai:
Naz raih gwnz raih laj,
Gij go'gyaj gou ndaem,
Go baenz go mbouj baenz,
Nuengx naeuz baenzlawz guh?

Mbwk:
Gij go'gyaj mwngz ndaem,
Hix aeu rox buenzsuenq,
Ciuq gohyoz daeuj guenj,
Luenh guh vaih gomiuz.

Sai:
Ndaem haeux mbouj ndaej sou,
Gou gaj ndaem makgai,
Ndaem mak mbouj guenj lai,
Mbouj yungh ndai cae naz.

Mbwk:
Mbouj yungh ndai cae naz,
Beix cengq da luenh naeuz,
Danghnaeuz sim mbouj haeuj,
Mak aeu dai byaiz doh.

Sai:
Ndaem hwnj le caiq ndai,
Miz geijlai rengz ok,
Gag gou boux vunz dog,
Ndae j ok geijlai rengz?

Mbwk:
Beix mwngz ndaem makgai,
Goq vunz lai daeuj guenj,
Yaek aeu rox buenzsuenq,
Guenj ndei mak cij baenz.

Sai:
Ndaw daeh mbouj miz ngaenz,
Baenzlawz goq ndaej vunz,
Guh ngamq ndaej gaeuq gwn,
Mbouj cwnh saek faen lawz.

Mbwk:
Nuengx caeuq beix doxyaeng,
Daengz ngaenzhangz ciq gonq,
Goq vunz bae gaj non,
Ok bonj cij miz leih.

Mbanjranz Gou

我的家乡

□ Banh Ginhsiu / 潘金秀

Mbanjranz gou dwg aen mbanj iq youq Vujmingz. Mbanjranz gou bya gyaеu, raemx gyaеu, vunz engq gyaеu. Daegbied dwg gaijgwz hailangh 40 bi neix daeuj, mbanjranz gou bienqvaq hungloet, ndaw mbanj bienq gyaеu bienq seuq lo, lwgminz cungqvunz haujlai cungj bienq fouq lo, ranzranz cungj miz gwn miz daenj, mbouj lau dai iek, haujlai ranz cungj hwnq le ranzlaeuz, cawx miz ciq dem.

Goengq bya mbanjranz gou aen daeb aen, aen hung riengz aen iq. Daj gyaе yawj bae heuswdsd, miz geij goengq bya iq mumjmumj gymqgyumq yienh youq ndaw fwj ndaw mok, gig ndei yawj, gij goengq bya humx aen mbanjranz gou, lumjnaeuz daxboh mbehai song fwngz got lwgnyez nei, “lwgnyez” youq ndaw rungj “daxboh” gig vuenyungz!

Raemx mbanjranz gou hix gig gyaеundei. Youq aen mbanj baihbaek, miz aen suiigu hungloet gvangqlangh ndeu, seiqhenz cungj dwg faex, raemx sawdikdik, faex heuswdsd, aen fai daj laj doxhwnj hwnjbae raezrangrang. Gyoengq lwgnyez cungj maij daeuj daengz gizneix guhcaemz, buet bae buet dauq, sing riu sing heuh saekrim

song rwz. Geij bi neix daeuj, miz vunz youq henz suiigu guh nungzgyahloz, aenvih funghgingj gig gyaеundei, miz gwn miz caemz, baez daengz couhmoz roxnaeuz cuengqgyaj, couh miz haujlai vunz ndawsingz baenz ranz baenz ranz roxnaeuz baenz bang baengzyoux daeuj youz. Ndaw mbanjranz nauhyied dangqmaz, hix hawj gij souhaeuj vunzmbanj ndaej demlai.

40 bi daeuj, lwgminz cungqvunz cungj caencaen yiengjsouh daengz gij ndeicawq gaijgwz hailangh, bouboux gaenx guhhong, miz gwn miz daenj, doxndiep doxgyaez, doxbang doxcoengh, bouboux ngoenzngoenz riu-nyumnyum, mbouj doxceng doxhoenx. Mbanj gou ranzranz cungj hwnq le ranzlaeuz, mizmbangj hwnq song caengz, mizmbangj hwnq sam caengz, ranz cungj cang ndaej gig ndei, ndawranz cungj dem miz densi、binghsiengh、gunghdiuz daengi gyahden, ngoenzngoenz gvaq ndaej onjdup.

Baenzlawz yiengh? Dingq gou gaisau mbanjranz gou le, daihgya dwg mbouj dwg cungj siengj bae mbanjranz gou yawjyawj ne? Angqcoux daihgya daeuj mbanjranz gou!

Gou gyaеz mbanjranz gou.